

Petri de Crescentijs / von dem
Wolff/ seiner Eigenschafft vnd
Natur.

Das erste Capitel.



Je Einwohner in Asien/ Africa/ vnd Europa/ erfahren täglich genugsam/ was schädlich/ grimmig vñ grausam Thier es vmb den Wolff sey/ denn sie nicht allein jnen selbst vnd jren Kindern/ sondern auch dem Vieh/ vnd dergleichen Thieren mehr grossen mercklichen schaden zufügen/ Gleicher gestalt werden auch die in America/ Bresilien Land genant/ vnd in den andern gülden Inseln/ Als Antillen in Florida vñ Französischer Landschaft/ Canaga/ Ochelage/ Sagneue vñ den neuen Landen/ Auch Schweden/ Nortwegen/ vnd andern gegen Morgen vnd Nidergang gelegenen Landen/ von solchen reissenden Thieren geplagt. Vnangesehen aber daß gar wenig Völcker gefunden werden/ welche nicht wissen solten/ was der Wolff (Engelland vnd Schottland außgenomien) für ein Thier sey/ Jedoch hab ich nicht vnterlassen können/ seine gestalt/ sitten vnd geberden/ Natur vnd vnterscheid derselbigen zu beschreiben.

Vnd ist der Wolff ein graufarbes Thier / mit schwarzem treiff vñ vntermischet/ vnten am Bauch aber weißlecht/ vnd hat einen grossen Kopff / starcke lange Zähne / kurze starcke Ohren/ Daher ist darnach das Sprichwort entstanden / Ich halte den Wolff bey den Ohren / wenn einer der da redet/ im zweiffel ist/ was er thun soll. Der hoch vnd insonders wolberühmyte Scribent Plinius/ sagt im zwey vnd zwenzigsten Capitel seines sibenden Buchs/ welches er von natürlichen Geschichten hat geschrieben/ daß des Wolffs gesicht vberaus schädlich vnd gefährlich soll seyn/ vñ daß/ so der Wolff den Menschen zum ersten ersicht / derselbige gleich darvon soll erstummen/ vñ jm die Rede gesiechen/ Item/ daß die Wolff in Africa gar klein/ in den kalten Landē aber gar groß/ scheußlich vnd grimmig seyn sollen/ Solches bestätigt auch der Dlaus Magnus / welcher ein Erzbischoff zu Upsallen in Gothien gewesen/ in dem dreizehenden Capitel/ seines achzehende Buchs/ welches er von den Historien der Völcker/ Thier vnd Vögel / in den Mittnächtischen Landen beschrieben hat/ vnd spricht / Plinius solle recht vnd warhafftig von den Wolfffen geschrieben haben/ vnd sonderlich/ daß sie ire grimmige Bosheit das mehrertheil im Jenner sollen gebrauchen / wenn sie in der Brunst der Wolffin nachtrollen / Sie sollen sich auch/ wenn es grimmig kalt ist/ in grosser anzahl zusammen hauffen / vnd in solcher anzahl desto grimmiger vnd kühner werden / bringen zu dem auch die Einwohner in den kalten Landen/ in eine solche grosse forcht vnd schrecken/ daß sie sich nicht dörfen allein auff die Weg vnd strassen wagen / sie hetten sich denn vorhin mit guten Armsbrusten oder Büchssen versehen vnd gewapnet/ Insonderheit aber fallen die Wolff die schwangere Frauen gern an/ damit sie also zerreißen vnd fressen.